

平  
津  
讀  
碑  
記

臨海洪君筠軒以所著讀碑記八卷示予讀之歎其  
勤且博近日錢詹事金石跋尾用意之精庶其近矣  
王司寇金石萃編雖廣撫而精密或不逮此也夫金  
石之足證經史其實證經者二十之一耳證史則處  
處有之記載楮柱曷可勝原惟當論其大者而已有  
如唐溫彥博史稱其褊急好爭論是非而碑特著其  
宏量不與人爭其相反乃若是岑江陵固不應作諛  
墓文此當表出之以資論世者金石文固不專以書  
論然若秦繹山碑魏受禪碑實以備篆隸體耳唐昇  
仙太子碑以其陰銜名出薛鍾二家手蹟而存之不  
則仆而毀之可也若職官之除授歲月之前後其實

有關係者著之可也其他偶有錯互者不能枚舉吾  
安能爲此費日損功耶至唐文宗大和宜据石刻以  
證板本作太之訛遼道宗壽昌据石刻以證史作壽  
隆之訛又如漢禮器碑闕里聖母姓并官氏以證姓  
氏書宋泰山碑尊賢下武以證補大雅傳說此書不  
載宋以  
後碑姑略  
撮言之諸如此類則亟宜表出之耳不然豈有傳  
注箋疏之不治而日矻矻焉從事於拓本者哉近日  
輯錄金石者多矣未有若洪君用心之精密者故於  
此略及之

嘉慶癸酉春三月廿有四日北平翁方綱時年八十  
有一

昔歐陽文忠訂集古錄於漢華山廟碑集靈宮曰他書皆不見惟見此碑浚儀王深寧尙書始援漢地理志補證之

國朝閣徵君輩遂有蓋代文人無過歐陽公學殖之陋亦無過公之誚甚矣考訂金石之難也筠軒此冊雖僅伯淵一家之藏然海內流傳碑刻略備攷經證史瞻博簡覈拾遺補罅無少疎漏翁覃谿閣學言其用心精密無過於此吾知此書出不復爲後之批尾家吹求彈射是則筠軒所自信也夫嘉慶丙子二月八書雨中跋於羊城臬署之吾未信齋靜樂李鑾宣金石文字之學歐趙以來至

國朝而大盛亭林竹垞揚鑣於前嘉定青浦接響於後考經訂史剖析六書旁通二氏美矣富矣吾友淵如觀察尤好是學收藏最夥筠軒在幕中久著平津讀碑記八卷考據明審於唐代地理尤多所得駸駸乎與諸前輩方駕矣宗彥素未研心碑刻近來稍涉兩唐書之學每遇事蹟舛午輒思得碑刻以證之讀筠軒此書多所開悟因題數語於冊首而歸之嘉慶壬申浴佛日德清許宗彥

淵如師喜金石文字生平游歷所至搜訪無虛日德州平津館所藏碑自周秦至唐末五代凡廿餘匣庚午冬頤煊始取而讀之見諸君題跋未盡間有所獲輒錄於左方積成八卷題曰平津讀碑記示所從得也昔家文惠公嘗假石邦哲王順伯兩家之碑撰隸釋隸續流傳至今頤煊少賤不能備金石之藏游幕平津始得盡見海內所有之碑雖才遠不及文惠所遇殆或過之夫世之所貴乎金石者以其足取證經史也聖賢經傳微言奧義典籍散亡往往得自學士之摘詞家狀之續述至國家易代脩史或采自傳聞或成于衆手殘舛譌闕勢不能免尤不若金石之出

于當時爲可據其他如六書之通轉文體之宗尚皆可於是窺其厓畧此其學所以日積而日昌也今世之爲是學者有錢少詹潛研堂金石文跋尾翁閣學兩漢金石記阮中丞山左金石志王少寇金石萃編武大令授堂金石跋皆海內尊向頤煊獲讀是碑復得從諸君後以商榷其是非則亦可以自慙也已嘉慶十六年太歲在未八月十四日臨海洪頤煊題于濟寧舟次

平津讀碑記卷一

臨海洪頤煊

周

吉日癸巳

右吉日癸巳四字相傳爲周穆王書在贊皇縣壇山上宋皇祐中宋祁始訪得之後鑿取陷置趙州廳壁政和五年取入內府亂後不知所在此本爲南宋越州石氏重刻本漢書地理志房子有贊皇山集古錄引穆天子傳登贊皇山以望臨城今本穆天子傳無此文此吉日癸巳四字不知何人附入乙酉天子西絕鉞陞郭璞注中



石鼓文

右石鼓文在國子監大成門左右石鼓至唐始顯後漢書鄧騭傳李賢注今岐州石鼓銘凡重言者皆爲二字宋人言石鼓見于唐人著錄者獨不及此注何也第一鼓𣪠字說文業古文作𣪠𣪠卽業字詩曰四牡業業與趨趨𣪠𣪠義合第四鼓𣪠字說文𣪠或从賁作𣪠或从奔作𣪠𣪠卽奔字鄭夾漈以爲拜字非也𣪠字作奔說極是或因戊鼓有奔字以疑此條愚謂甲鼓邈字與庚鼓我字何妨並見此卽𣪠與奔一字而丁鼓戊鼓並見之例也覃簪

孔子題季子墓碑

右孔子題季子墓碑文云於庠有吳延陵君子之墓

相傳爲孔子書唐大歷十四年蕭定取殷仲容摹本刻于丹徒九里鎮季子廟中吳郡張從申有記宋崇寧元年朱彥又摹刻于江陰申港季子墓淳化閣帖中亦有刻本其篆法互異郭忠恕汗簡引墓字古文又與各本不同

秦

### 琅邪臺刻石

右琅邪臺刻石在諸城縣東百六十里碑十三行八十六字首行五夫二次行五夫三楊樛三行皇帝曰以下皆二世詔書與史記始皇本紀所載無異當時每刻石後皆著此段文本紀云盡刻始皇所立刻石

石旁著大臣從者名五大夫趙嬰五大夫楊樛前從  
始皇與議於海上故二世刻石復著其名于石旁

### 泰山刻石

右泰山刻石舊在山頂四面有字宋大觀中劉跂拓  
得二百二十三字爲泰山篆譜至明北平許口僅得  
此二十九字于榛莽中移置碧霞元君祠東廡乾隆  
五年祠火此石遂亡今有嶽廟重刻本譌舛不足觀

### 嶧山刻石

右嶧山刻石據封氏聞見記後魏太武登山使人排  
倒此碑後世傳摹重刻今所見本以長安鄭文寶本  
爲最佳說文入古文及秦刻石及如此此碑陀及五

帝及字不如此作

漢

魯孝王刻石

五鳳二年六月

右魯孝王刻石在曲阜縣孔子廟文云五鳳二年魯  
卅四年六月四日成金明昌二年始出土高德裔曼  
卿有記錢辛楣少詹謂魯孝王慶忌以後元元年嗣  
則五鳳二年當爲孝王之三十三年頤煊謂漢表據  
踰年改元故以後元元年爲孝王慶忌元年此魯國  
所書以卽位之日爲始故自征和四年下距五鳳二  
年爲三十四年漢表諸侯王皆踰年改元唯武帝紀  
元朔元年書魯王餘薨表書元朔元年安王光嗣末

今年清議碑前卷一  
三  
踰年改元此乃其變例也

居攝墳壇刻石

居攝二年二月

右居攝墳壇刻石在曲阜縣孔子廟一曰上谷府卿墳壇一曰祝其卿墳壇皆居攝二年二月造卿猶君也尊美之詞上谷府卿上谷太守也猶西嶽華山碑弘農太守稱袁府君祝其卿祝其令也猶郎中鄭固碑著令稱著君卿爲上下通稱故武開明碑終於吳郡府丞武榮碑稱吳郡府卿南安長王君平鄉道碑有丞什邡王卿尉綿竹楊卿卿卽君也

漢中太守郃君開褒斜道碑

永平六年

右郃君開褒斜道碑在褒城縣北石門宋紹熙末南

鄭令晏表有記并釋文據楊孟文石門頌永平四年  
詔書開余鑿通石門此碑云永平六年漢中郡以詔  
書受廣漢蜀郡巴郡徙二千六百九十人開通褒余  
道其相距止二年又云郵亭驛置徒司空褒中縣官  
寺并六十四所漢書地理志有船司空百官公卿表  
有水司空此徒司空亦官名隨事所立故續漢志不  
書晏表記云一百五十九字今拓本止一百三十二  
字

三公山碑

元初四年

右三公山碑在元氏縣城外野坡上河朔訪古記三  
公神廟在元氏縣西北三十里封龍山下有漢三公

山碑一通卽此碑後漢書淮陽王昞傳永元十三年  
立防子侯爲常山王延平元年就國立二十五年薨  
是爲靖王此碑云元初四年常山相隴西馮君到官  
當靖王就國之十二年碑云國界大豐穀斗三錢明  
帝紀永平十三年歲比登稔粟斛三十斗曰斛斛  
三十卽斗三錢碑字作升或釋爲升字非

嵩山太室神道石闕銘

元初五年四月

右嵩山太室石闕在登封縣中嶽廟南百餘步前後  
兩銘碑額中嶽泰室陽城□□九字陽文篆書前  
銘二十七行以後不可計元初五年四月刻後銘四  
十六行延光四年三月刻字不甚大每行俱有界畫

直線依翁閣學兩漢金石記所釋其未舉者前銘十八行第三是史字十九行第九是之字後銘首脫四行二行有地字四行有三字五行有十字三字七行有孝字九行孔子上是公字十一行有陽字十二行有北海相字十四行有屬字十七行有縣字二十二行有雙字二十六行額上是存字三十行有是字三十二行有親字四十行有置字後銘有潁川太守字訪碑錄題爲潁川太守題名卽此碑

嵩山少室神道石闕銘

延光二年三月

右少室神道石闕銘在登封縣西十里邢家鋪碑額少室神道之闕六字陰文篆書依翁氏所釋二十二



行亦有界畫直線將作掾嚴壽與太室前銘鄉三老嚴壽是一人漢書地理志西河郡有圜陽圜陰師古曰圜字本作圓王莽改爲方陰當時已誤爲圜字此銘亦作圜陽此銘上層諦視之尙有以山亶靈來名疇數字隱隱可辨牛氏金石圖未載

### 少室東闕題名

右少室東闕題名在少室神道石闕銘之東題名十  
二人令常令容史記孝文本紀中大夫令勉顏游秦  
以令是姓風俗通令姓令尹子文之後祖卽查字

### 嵩山開母廟石闕銘

金石文字記延光二年

右開母廟石闕銘在登封縣北十里崇福觀東依翁

氏所釋下層十一行前尙有一行有字隱隱可辨祀  
聖母庠山隅後上下層脫一行所未釋字尙多蓋所  
得拓本有優劣也太守朱寵以下題名共十一人與  
少室神道石闕同者八人佐卽廟佐隘作隣胥作胄  
伯鯨作栢鯨逍遙作消搖九山刊旅作九山甄旅皆  
異文

延光殘碑

延光四年六月

右延光殘碑康熙年間諸城縣修超然臺出土中今  
移置縣署碑文五行皆有界畫直線碑首界畫外有  
字似碑額橫書碑唯下段可辨末行有延光四年六  
月卅日庚戌字極分明第三行中段尙有郡字孫字

平津讀碑記卷一  
可辨金石萃編山左金石志俱未釋

敦煌太守裴岑紀功碑 永和二年八月

右敦煌太守裴岑紀功碑在巴里坤城西北三里關帝廟前後漢書西域傳延光二年陳忠上疏以爲敦煌宜置校尉案舊增四郡屯兵以西撫諸國故前後西域出師皆敦煌太守將兵裴岑爲敦煌太守當在徐由之後司馬達之前而史不書其名此碑巴里坤土人有重刻本有德祠海祠之辨諦視此本作謹本是德字後人誤釋作海耳

北海相景君銘并陰 漢安二年八月

右北海相景君銘在濟寧州學宮碑雖漫漶諦視之

不可辨者無幾景君以司農屬官出宰元城遷益州  
太守以路遐戀親改北海相以病去官漢安二年仲  
秋卒三載後故吏諸生乃立是碑惜不書其名字邑  
里碑云北海部城十九續漢志北海國十八城樂安  
國益壽光二縣皆故屬北海此時當有一縣未改屬  
碑陰有故午六人續漢志里有里魁民有什伍什主  
十家伍主五家以相檢察午卽伍也隸續以午爲幹  
字之省非是

敦煌長史武斑碑

建和元年二月

右敦煌長史武斑碑在嘉祥縣紫雲山碑云建和元  
年太歲在丁亥二口辛巳朔桓帝紀建和元年正月

辛亥朔正月大故二月辛巳朔碑與史合斑字宣張  
據武氏石闕銘宣張仕濟陰年廿五曹府君察舉孝  
廉除敦煌長史碑俱約綜其詞以永嘉元年□月□  
日遭疾□河間高陽史恢等追惟昔日同歲郎署故  
□石銘碑似斑舉孝廉爲尙書郎故碑云□翼紫宮  
領校秘書鄭續漢志注引決錄注故事尙書郎以令史  
久缺補之世祖始改用孝廉爲郎斑以孝廉爲尙書  
郎領校秘書除敦煌長史其官階亦相合

武氏石闕銘

建和元年三月

右武氏石闕銘在嘉祥縣紫雲山黃小松司馬始訪  
得之武斑碑在建和元年二月辛巳朔廿三日癸卯

此闕在建和元年三月庚戌朔四日癸丑其相距止  
十二日武斑碑稱武氏漢興以來爵位相踵此闕有  
武始公弟綏宗景興開明開明子宣張宣張卽斑也  
開明爲吳郡府卿又有中子榮字舍和舉孝廉郎中  
遷執金吾丞綏宗名梁爲從事子仲章季章季立孫  
子僑武梁武榮俱有碑亦氏族之盛者

司隸校尉楊孟文石門頌

建和二年十一月

右司隸校尉楊孟文石門頌在褒城縣北五里水經  
沔水注褒水又東南歷小石門門穿山通道六丈有  
餘刻石言漢明帝永平中司隸校尉犍爲楊厥之所  
開逮桓帝建和二年漢中太守同郡王升嘉厥開鑿

之功琢石頌德卽此碑也碑云永平四年詔書開余  
鑿通石門中遭元二西夷虐殘橋梁斷絕於是故司  
隸校尉權爲武陽楊君厥字孟文數上奏請帝用是  
聽則楊君之開通石門不在永平中也楊君名渙字  
孟文其云厥者助語之詞順帝紀延光四年詔益州  
刺史罷子午道通褒斜路隸釋以爲卽從楊君之所  
請建和二年仲冬漢中太守王升勒石頌德距其時  
又二十四年矣

孔廟置守廟百石卒史碑

永興元年六月

右孔廟置守廟百石卒史碑在曲阜縣孔子廟司徒  
雄司空戒以元嘉三年三月廿七日壬寅奏雒陽宮

卽以是日下魯相承書從事下當用者魯相平以永興元年六月甲辰朔十八日辛酉上司空府桓帝紀元嘉三年五月丙申改元永興其置百石卒史始末止八十日碑云褒成侯四時來祠事已卽去史晨祀孔子奏亦云雖有褒成世享之封四時來祭畢卽歸國漢書恩澤侯表褒成侯國在瑕丘地理志瑕丘屬山陽郡是時孔子襲封子孫不在魯國故魯相乙瑛請置百石卒史典主守廟魯令鮑豐造作百石吏舍亦考闕里文獻者所宜知也

宛令益州刺史李孟初神祠碑

永興二年六月

右宛令益州刺史李孟初神祠碑在南陽縣其名已



闕孟初其字也舉孝廉除郎中遷宛令益州刺史己亥朔十日下金石萃編有宛令二字諦視此碑亦有而兩漢金石記無之宛爲南陽郡治貴君以下皆宛令故吏名

孔謙碑 永興二年七月

右孔謙碑在曲阜縣孔子廟謙字微泐尙可辨謙字德讓宣尼公廿世孫都尉君之子也漢書平帝紀元始元年六月追謚孔子曰褒成宣尼公都尉君者泰山都尉孔宙也後漢書孔融傳父宙泰山都尉李賢注引融家傳兄弟七人融第六唯有兄褒見融傳不及謙也孔宙碑年六十一延熹六年正月卒謙卒于

永興二年七月時宙尙存年五十一獻帝紀建安十三年八月曹操殺太中大夫孔融融本傳時年五十六謙卒時融止二歲

孔君殘碑

永壽元年

右孔君殘碑何夢華上舍訪得於孔林墻外今移置孔子廟元年乙未上字已泐趙明誠金石錄定爲桓帝永壽元年碑云孔子十九世孫當是孔宙孔彪兄弟行其所歷官五官掾守長史兼行相事字尙可辨

魯相韓勅造孔廟禮器碑并陰兩側

永壽二年

右魯相韓勅造孔廟禮器碑在曲阜縣孔子廟水經泗水注魯人藏孔子所乘車於廟中是顏路所請者

也永平中鍾離意爲魯相到官出私錢萬三千文付戶曹孔訢治夫子車此碑亦云脩飾宅廟更作二輿在意之後續漢志東武陽屬東郡孔宙碑亦云東郡東武陽此碑獨書東郡武陽省東字

郎中鄭固碑 延熹元年四月

右郎中鄭固碑在濟寧州學宮碑舊拓止上段近始得下段殘石又洗出中段拓本始完固字伯堅著君元子續漢志著屬濟南國其父爲著令也延熹元年二月十九日詔拜郎中以疾錮辭未滿期限乃遭凶愍其四月廿四日遭命殞身漢書汲黯傳黯多病病且滿三月上常賜告者數疏廣傳卽日父子俱移病

病三月賜告廣遂稱篤固自拜官至卒止六十餘日故尙未滿期限琦瑋延以爲至德不祀爾雅延長也琦瑋當是其兩弟名

蒼頡廟碑并陰兩側

延熹五年正月

右蒼頡廟碑在白水縣東北五十里史官村續漢志衙縣注引皇覽曰有蒼頡冢在利陽亭南墳高六丈後人因建廟于其縣廣韻倉姓黃帝史官倉頡之後此碑作蒼碑額有左馮翊東牟平陵衡君東牟屬東萊郡此云東牟平陵當由東牟而遷于平陵也碑字體最小漫漶亦最甚兩側明白可辨

泰山都尉孔宙碑并陰

延熹七年七月

右泰山都尉孔宙碑在曲阜縣孔子廟宙字季將孔子十九世孫孔融父也後漢書孔融傳年十歲隨父詣京師年十三喪父獻帝紀建安十三年八月曹操殺太中大夫孔融融傳云時年五十六融當生于永興元年此碑宙年六十一延熹六年正月己未卒時融年十一後漢書融傳作十三喪父者誤也桓帝紀延熹三年九月太山琅邪賊勞丙等復叛寇掠百姓十一月太山賊叔孫無忌攻殺都尉侯章十二月遣中郎將宋資討破之宙爲泰山都尉當在侯章之後融年十歲隨父詣京師則宙之爲泰山都尉會遭篤告休當在延熹五年

竹邑侯相張壽碑

建寧元年五月

右竹邑侯相張壽碑在城武縣學宮後人截其碑爲  
碑趺而穴其中今僅存一百八十字隸續載此碑甚  
完後漢書彭城靖王恭傳永初六年封恭子阿奴爲  
竹邑侯壽遷竹邑侯相遭江楊劇賊役賦彌年質帝  
紀永嘉元年廣陵賊張嬰等復反攻殺堂邑江都長  
九江賊徐鳳等攻殺曲陽東城長本初元年詔曰九  
江廣陵二郡數離寇害殘夷最甚碑所謂江楊劇賊  
卽此壽視事年載治功曹周憐放濫爲督郵周紘所  
表捐祿後復辟司徒府年八十建寧元年五月辛酉  
卒是月丁未朔辛酉十五日也

衛尉卿衡方碑并陰

建寧元年九月

右衛尉卿衡方碑在汶上縣西南十五里郭家樓碑云詔選賢良招先逸民務在寬失李固傳伏聞詔書務求寬博寬博卽寬佚也已從政者退就勅巾陳寔傳飾巾待終趙咨傳使飾巾出入李賢注以幅巾爲首飾不加冠冕謂棄官以就舉也安貧樂道皇侃論語義疏本作未若貧而樂道少以文塞長以欽明卽尙書考靈曜欽明文塞晏晏此碑用古義最多餘皆如諸家所釋

魯相史晨奏祀孔子廟碑

建寧二年三月

右魯相史晨奏祀孔子廟碑在曲阜縣孔子廟史晨

奏以建寧二年三月癸卯朔七日己酉上尙書時副  
言太傅太尉司徒司空大司農府治所部從事續漢  
志以太傅太尉司徒司空大將軍爲五府此大司農  
亦稱府大司農掌諸錢穀金帛諸貨幣晨奏祀孔子  
依社稷出王家穀春秋行禮以共煙祀是其專掌故  
并及之

魯相史晨饗孔廟後碑

右魯相史晨饗孔廟後碑卽刻在前碑之陰史晨以  
建寧元年四月十一日戊子到官而饗孔廟及補完  
廡垣脩通大溝又昌平亭下立會市孔濱南北種梓  
假夫子冢顏母井舍及魯公冢守吏事皆在前碑之



後魯公冢者伯禽冢也魏書地形志魯有伯禽冢續漢志補注引皇覽曰奄里伯公冢在城內祥舍中民傳言魯五德奄里伯公塋其宅伯公卽伯禽之譌

淳于長夏承碑

建寧三年六月

右淳于長夏承碑在永年縣紫山書院金石錄云元祐間因治河隄得于土壤中余家所藏漢碑二百餘卷此碑最完至明中葉此碑猶存唯下半截殘缺今世所傳有闕三十字本闕一百十字本成化間補刻下半截本嘉靖二十三年碑爲築城工役所毀知府唐曜重刻于淳川書院卽此本也舊本勤約重刻本作勤紹末云建寧三年蔡邕伯喈書是後人肥題

陳德殘碑

建寧四年三月

右陳德殘碑牛氏金石圖云碑在沂州府東南數十里田間邵陽褚峻跡得之搨數本則土人埋之矣或云卽褚千峯僞造碑止存上截十行行五字每字有方格界線碑陰十一行俱有額諦視之字僅形似乏漢隸淳古之氣其爲僞造無疑

武都太守李翕西狹頌

建寧四年六月

右武都太守李翕西狹頌在成縣摩崖書翕漢陽阿陽人阿陽水經漾水注作河陽漢書高帝紀師古曰阿陽今流俗書本或作河陽者非也後漢書隗囂傳李賢注亦云本爲河陽者誤也此碑作阿陽與續漢

志同碑額有惠安西表四篆字年月後有丞右扶風  
陳倉呂國字文寶小字題名二行又有丞右扶風陳  
倉呂國字文寶大字題名十二行卽隸續所謂天井  
道題名

李翕鼃池五瑞圖

右李翕鼃池五瑞圖在西狹頌之前上層爲白鹿黃  
龍下層爲甘露降承露人嘉禾木連理後題君昔在  
鼃池脩崑嶽之道德治精通致黃龍白鹿闕下之瑞故  
圖畫其像又有上官掾上祿上官正字君選題名三  
行後尙有龍字隱隱可辨

博陵太守孔彪碑并陰

建寧四年七月

右博陵太守孔彪碑在曲阜縣孔子廟故吏崔烈等  
所立續漢志無博陵郡桓帝紀延熹元年六月丙戌  
分中山置博陵郡以奉孝崇皇園陵水經涑水注漢  
質帝本初元年繼孝冲爲帝追尊父翼陵曰博陵因  
以爲縣又置郡焉漢末罷還安平故續漢志不書此  
本桓帝繼質帝水經注以爲質帝繼冲帝酈氏之誤  
博陵置縣在本初元年置郡在延熹元年以此碑陰  
證之屬縣曰博陵曰安平曰安國曰高陽曰南深澤  
成陽靈臺碑又有蠡吾皆屬博陵郡彪爲尙書侍郎  
見韓勅碑陰爲河東太守見史晨後碑

李翕析里橋卹閣頌

建寧五年二月

右李翁析里橋郝閣頌在略陽縣隸釋所載缺四十一字後有年月題名五行金石萃編本無年月題名視隸釋多闕十三字此本又視王氏本多缺三十七字然皆非明申如埴翻刻之本此本建寧三年與隸釋同王氏本作五年當由摹刊之譌香風有隣香通作鄉香風卽嚮風醴散關之嶰潔說文案舉也舉山形玉篇舉同案潔卽螺字之借諸家皆誤釋

執金吾丞武榮碑

右執金吾丞武榮碑在濟寧州學宮關幘傳講孝經論語漢書史記左氏國語今碑漢書史記四字已泐漢書藝文志太史公百三十篇東平王思傳上書求

太史公書楊終傳受詔刪太史公書此皆秘府藏本  
漢書亦至漢末有應邵集解服虔音義二書之傳榮  
其嚙矢矣碑云內幹三署後漢以五官署左右署爲  
三署謂榮爲五官掾也碑字十行行三十字僅刻碑  
之半、

司隸校尉楊淮表紀

熹平二年二月

右司隸校尉楊淮表紀在褒成縣褒斜谷叙淮與從  
弟彌前後歷官稱元弟功德牟盛當究三事不幸早  
隕二君清口約身俱大司曄孟文之元孫也後漢書  
任城王以元和元年封傳六十八年國絕當元嘉元  
年至延熹四年復爲國淮爲任城太守當在元嘉至

延熹十年中孟文名渙見華陽國志司隸校尉稱大司隸亦僅見此碑

司隸校尉魯峻碑并陰

熹平二年四月

右司隸校尉魯峻碑在濟寧州學宮峻爲司空王暢所舉徵拜議郎太尉長史御史中丞延熹七年二月丁卯拜司隸校尉後漢書靈帝紀建寧元年四月長樂衛尉王暢爲司空八月司空王暢免碑叙在延熹七年以前何也碑陰河內夏營懿旁遠千河內無夏縣此與楊孟文石門頌量漢疆同爲東漢二名之證平原西平昌續漢志平原九城今本八城西平昌三字脫在樂安國注中河間阜城續漢志阜城屬安平

國此時猶屬河間河東蒲坂作反魏郡黎陽作犁皆與續漢志異

熹平殘碑

熹平二年十一月

右熹平殘碑在曲阜縣孔子廟近時始出土年廿有七熹平二年十一月乙未蓋其卒時年月靈帝紀是年十二月癸酉晦乙未爲十一月廿一或廿二也但無官爵名氏府君者是稱其立碑之人故書在卒後孔褒碑亦魯相汝南陳府君立即其證錢辛楣少詹謂當是曾任郡守者卒時年厘廿有七非是

武都太守耿勲碑

熹平三年四月

右武都太守耿勲碑在成縣隸續有此碑後殘泐重



開故多譌字癸酉到官重開本作癸日郎官勸勉趨  
時重開本勉作課□如農重開本作大小民此本雖  
已重開而翁王兩家據隸續所補之字此尙隱隱可  
辨洵可寶也扶活下隸續作□餐諦審此碑是履賢  
二字內則注似今膏唇矣說文賢小兒嬾賢外羌且  
下隸續作□諦審此碑是居字

聞憲長韓仁銘

熹平四年十一月

右聞憲長韓仁銘在滎陽縣署金正大中滎陽令李  
天翼得于京索間土中碑止存上截碑右有正大五  
年趙秉文李獻能題字前半似叙司隸校尉績勲下  
云尉表上似仁爲司隸校尉所表遷槐里令除書未

到而卒續漢志縣萬戶以上爲令不滿爲長仁自聞  
憲長遷槐里令如今之調繁孔宙碑都昌長遷元城  
令張遷碑除穀城長遷蕩陰令皆其證

堂谿典嵩高山石闕銘

熹平四年

右堂谿典嵩高山石闕銘在登封縣開母廟石闕銘  
下趙明誠金石錄堂谿典嵩高山石闕銘云中郎將  
堂谿典伯并熹平三年來請兩嵩高廟此銘前數行  
已泐尙隱隱可辨如趙之言典大君諱協字季度爲  
郡主簿作闕銘文後舉孝廉西鄂長早終熹平四年  
典來請兩嵩高廟重泐此銘後漢書延篤傳注引先  
賢行狀典字季度爲西鄂長以協爲典恐由唐人徵

引之誤靈帝紀熹平五年復崇高山爲嵩高山注東觀記曰使中郎將堂谿典請雨因上言改之典請雨在四年山改名在五年

豫州從事尹宙碑

熹平六年四月

右豫州從事尹宙碑在鄢陵縣孔子廟碑云分趙地爲鉅鑣顧亭林謂鉅鹿之鹿不當從金錢辛楣少詹謂廣韻注明言鉅鑣郡名後魏弔比干碑陰有鉅鑣伯魏祐北史有鉅鑣郡守元道龍頤煊近見魏靈藏造像記亦作鉅鑣魏靈藏後漢書陳敬王羨傳建初三年與鉅鹿王恭就國影宋本北堂書鈔第七十卷引范後漢書作鉅鑣王足證古本皆作鑣

溧陽長潘乾校官碑 光和四年十月

右溧陽長潘乾校官碑在溧水縣學宮碑云口此龜  
艾遂尹三梁龜謂印紐艾謂青綬續漢志進賢冠公  
侯三梁中二千石以下至博士兩梁故此碑以三梁  
爲頌禱之詞靈帝紀光和四年九月庚寅朔碑云十  
月己丑朔是年閏九月小故十月己丑朔兩漢金石  
記謂是閏十月己丑朔者誤也有天口德之絕操諦  
視天下是涇字翁王亦未舉

白石神君碑 光和六年

右白石神君碑在元氏縣開化寺碑云縣界有六名  
山三公封龍靈山先得法食去光 and 四年三公守民

蓋高等始爲無極山詣太常求法食相縣以白石神  
君道德灼然乃具載本末求依無極爲比六名山者  
此碑得其五其一則御語山也見元初四年三公山  
碑毛詩雲漢篇敬恭明神釋文本神作祀此碑作敬  
恭明祀與陸氏本同

尉氏令鄭季宣碑并陰

中平二年四月

右尉氏令鄭季宣碑在濟寧州學宮此碑宋時已殘  
缺隸續所錄僅二百六十八字碑陰二百九十二字  
兩漢金石記舊拓本可見者四十八字碑陰九十一  
字此本可見者三十一字碑陰七十七字協上神人  
二字甚明金石萃編摹本反闕之翁氏本又不著協

字何也

郃陽令曹全碑并陰

中平二年十月

右郃陽令曹全碑在郃陽縣孔子廟明萬厯初出土  
時止缺一因字後乃中有斷裂又後乾字中日有穿  
連之世恒以此辨拓本新舊全以建寧二年舉孝廉  
除郎中拜西域戊部司馬遷右扶風槐里令棄官光  
和六年復舉孝廉除郎中拜酒泉祿福長轉拜郃陽  
令門下掾王敞等刊石紀功末言君高升極鼎足此  
時全尚存也碑云縣前以河平元年遭白茅谷水災  
退於戊亥之間興造城郭是後舊姓及脩身之士官  
位不登君乃閔縉紳之徒不濟開南寺門承望華嶽

鄉明而治庶使學者李儒樂規程寅等各獲人爵之  
報戊亥之間謂西北隅以干支紀方位尙書大傳已  
然今人因科名罕雋改造城垣官署冀得顯仕觀此  
碑知其風始于東漢矣碑陰有徵博士李儒文優

蕩陰令張遷碑并陰

中平三年二月

右蕩陰令張遷碑在東平州學宮明時始出碑爰旣  
且於君暨字分爲二顧亭林疑爲後人重刊其實當  
時撰文一人書石一人古碑往往有文義相屬中空  
一格此無足怪遷治京氏易京氏長於災變分六十  
卦更直日用事以震離兌坎爲方伯監司之官專主  
四時此云二月震節卽京氏義也周禮職方氏言四

夷八蠻七閩九貉五戎六狄明堂位言九夷八蠻六戎五狄大戴記言六蠻四夷爾雅言九夷八狄七戎六蠻此碑又云八蠻七戎五狄九夷皆所見本異

豫州從事孔褒碑

右豫州從事孔褒碑雍正三年始出於曲阜縣東周公廟側今移置孔子廟碑云君諱褒字文禮孔子廿世之孫泰山都尉之元子卽孔謙孔融之長兄也褒與融留舍張儉後事泄送獄一門爭死詔書坐褒儉抵褒時融年十六當建寧元年史晨饗孔廟後碑立于建寧二年間稱處士孔褒文禮其時尚未爲豫州從事孔謙以永興二年七月卒年卅四褒爲謙兄自



建寧二年上距建光元年謙生時已四十九年衰死時當又不止於此數之歲

魯相謁孔廟殘碑

右魯相謁孔廟殘碑在曲阜縣孔子廟隸釋有此碑土人稱爲吉日令辰碑以第一行有吉日令辰四字也牛氏金石圖誤題爲孔宏碑近時搜訪始有碑陰并碑側唐人題字見山左金石志

中部督郵殘碑陰

右中部督郵殘碑陰在曲阜縣孔子廟碑多剝裂痕似竹葉土人因名爲竹葉碑其正面亦有字碑陰所書有中部督郵南部督郵北部督郵續漢志每郡有

五部督郵是也又有中賊曹左賊曹右賊曹左戶曹  
右戶曹左決曹右決曹奏曹辭曹功曹不分中左右  
當日分曹必有繁簡之別續漢志不書

### 戚伯著碑

右戚伯著碑見隸釋第十二卷隸釋稱碑而爲性焉  
以性爲姓也此本作姓字甚分明隸釋焉下

闕漢三

字亡

闕二

此本焉下

闕六

漢比隸釋少一字又闕字

位置不同碑末隸釋卿相之下

闕十

有伯著二字此

本無之隸續碑式戚伯著碑隸額一行十九字此本

止之碑二字碑十二行行二十字此本剪裁每行約

六字有直剪痕而無橫接痕非隸釋隸續所見之本

孫退谷有戚伯著碑見朱竹垞曝書亭集此本有北海孫氏珍藏書畫印

仙人唐公房碑

右仙人唐公房碑在城固縣西北三十里碑殘泐僅存三百餘字以隸釋讀之王莽居攝二年君爲郡吏是時府在西成去家七百餘里休謁往來轉景卽至漢書地里志漢中郡西成第一縣續漢志南鄭第一縣西成第三縣觀此碑西漢漢中郡治西成足訂閻百詩潛邱札記謂西漢郡治非必第一縣漢中郡治不在西成之誤

子旂殘碑

右子旂殘碑與下劉君元孫正直三殘碑在安陽縣西門君祠中此碑存十二行七十八字首云允字子旂不知其姓第六行末有永初二年允當是安帝時人敝卽輔字

### 劉君殘碑

右劉君殘碑一石存六行十五字第二行有春秋博覽四字當亦顓經之士一石存五行二十二字有國之裔兮四字因知其人姓劉兩石中皆有穿孔碑側有歲在辛酉三月十五八字

### 元孫殘碑

右元孫殘碑存七行十八字第二至第四行無字可

知唯遺孤奉承大兄元孫早終二子名重字元口而已

正直殘碑

右正直殘碑存八行三十八字第一行有正直是以揚名于州里第二行有部職二字其人似常爲曹掾第四行終年下似卅字碑中有大穿孔下有年三二字似其人終時年卅口當口年之三月也碑字覈作覈究作究其作元

魯王墓石人胸前題字

右魯王墓石人胸前題字一曰府門之卒一曰漢故樂安太守鹿君亭長舊在曲阜縣魯恭王墓前今移

置甕相圖此當爲樂安太守麴君墓前之物與魯恭王墓相近土人因稱爲魯王墓石人太守稱府君故此石人稱府門之卒

孝堂山石室畫象

右孝堂山石室畫象在肥城縣西北六十里舊釋是郭巨石室有永建四年永康元年題字所畫岑樓重閣屋脊設鳳凰或猴或雁形貴者冠皆平樣前仰後俯卽續漢志所謂進賢冠次則前低後高如紗帽無翅賤者銳其上車皆兩輪兩較較或高出輪半前式減輪半或兩較高僅及輪半前式又減較半或竟無兩較中有平蓋圓形出較上一棖擎之又有曲榦枝

其四角榦或在較外又有較與蓋四周相屬如今車形卽古之安車或一人中坐較僅及肩一人前立執輿一人後立侍車皆空其後面或駕四馬或兩馬或一馬皆一轅上曲繫於馬首大王車駕以四馬馬首有衡衡上立一鳥長尾形續漢志乘輿鸞雀立衡徐廣曰置金烏於衡上是貴者所乘又有兩輪車四人繩挽之古謂之輦又有兩輪車上濶下狹中坐四人蓋極高有兩人持刀舞及懸一物如鼓形亦御以兩馬疑卽續漢志所謂黃門鼓車

武梁祠堂畫象

右武梁祠堂畫象在嘉祥縣南武宅山凡三石石五

層中三層畫皆有題字帝王伏羲至夏桀十人唯黃  
帝顓頊帝侑帝堯帝舜冕服梁節姑姊抹者齊繼母  
無鹽醜女榆母章孝母婦人皆長服被土曾母投杼  
坐機上機制與今同其足略小或以爲古人纏足之  
證非也車凡九見轅蓋之制皆與孝堂山畫象同唯  
處士牛車略異

### 武氏前石室畫象

右武氏前石室畫象在嘉祥縣武氏祠凡十五石三  
石無字文王十子題字可見者七人魯秋胡老萊子  
荆軻秦武陽已見祠堂畫象此復畫之有曰此君車  
馬君爲都口時君爲市掾時爲督郵時不知武氏何



人

武氏後石室畫象

右武氏後石室畫象在嘉祥縣武氏祠凡十石題字俱漫漶有石柱題武家林三字黃小松司馬謂邊幅隱隱八分書中平等字諦視之不可辨

武氏左石室畫象

右武氏左石室畫象在嘉祥縣武氏祠凡十石惟第一石有顏淑侯羸王陵母范贖四段事迹題字顏淑毛詩巷伯傳作顏叔子

武氏石室祥瑞畫象

右武氏石室祥瑞畫象在嘉祥縣武氏祠凡二石每

段畫祥瑞草木禽魚之狀題記皆與孫氏瑞應圖宋書符瑞志相同白魚武口津入于王自本今文泰誓獸作𪚩又作鄮禦作衙𪚩𪚩作巨𪚩皆異文

武氏石室新出畫象

右武氏石室新出畫象凡九石一石上下俱漫泐中有武氏祠三大字八分書一石上有獸首口銜大環與射陽石門畫象同一石上層二人騎馬前後行下層漫泐中層似有題字五行不可辨餘俱作人馬宮室形無題字

孔子見老子畫象

右孔子見老子畫象舊在嘉祥縣武宅山今移置濟

寧州學宮此畫象見隸續老子車後三人隸續止一人隸續老子曳曲竹杖今杖已泐老子車兩較與蓋相連孔子車兩較僅及蓋十分之七隸續未釋

洪福院畫象

右洪福院畫象在嘉祥縣劉村凡三石唯一石有成王周公魯公三人題字成王南面周公魯公在成王右東面冠前仰後俯又有侍臣二人在成王左西面冠前後齊無題字餘如翁氏所釋

射陽石門畫象

右射陽石門畫象在寶應縣東七十里射陽聚今爲汪容甫取歸江都凡二石孔子見老子象孔子居中

西面老子居左東面一弟子在孔子後西面與濟寧州學宮象不同中層中間有如今之佛坐有一人赤身居其上左右侍立各一人皆可辨餘如翁氏所釋朱鮪墓石室畫象

右朱鮪墓石室畫象在金鄉縣西三里皆畫男女燕饗杯盤尊勺帷屏之屬朱長舒之墓并鮪字四行題字山左金石志記之詳矣以此本諦視之一幅尙有朱字極分明

平津讀碑記卷一

終

平津讀碑記卷二

臨海洪頤煊

魏

公卿上尊號奏

黃初元年

右公卿上尊號奏亦名勸進碑在許州繁城鎮碑首  
結銜四十六人自陛下卽位光昭文德以下刻於碑  
陰據魏志文帝紀注延康元年十月丙午漢帝使張  
音持節禪位相國歆太尉詡御史大夫朗等前已上  
表勸進丁卯令不受己巳魏王復上書辭庚午復冊  
詔魏王桓階等議定辛未魏王登壇受禪改爲黃初  
元年此表是最後所上當在己巳夕間庚午冊詔之

不平津諸碑記卷三  
前侍中劉廙表稱今月十七日己未己巳是十月廿七日也

受禪碑

黃初元年十月

右受禪碑在許州繁城鎮碑首云唯黃初元年冬十月辛未皇帝受禪于漢氏辛未十月廿九日也集古錄據此碑以訂魏志十一月庚午王登壇受禪之譌其說極核裴松之注引獻帝傳亦云辛未魏王登壇受禪與此碑合碑云納于大鹿欽明文塞上在璿機烟于六宗皆用今文尙書常伯常任納言諸節諸節二字本今文泰誓又云口唐典之明憲遵大鹿之遺訓亦可爲舜典合于堯典一篇之證

封宗聖侯孔羨碑

黃初元年

右封宗聖侯孔羨碑在曲阜縣孔子廟碑云黃初元年大魏受命追存二代三恪之禮秉紹宣尼褒成之後以魯縣百戶命孔子廿一世孫議郎孔羨爲宗聖侯以奉孔子之祀魏志在黃初二年蓋封孔羨爲宗聖侯在黃初元年十一月後詔制三公及令魯郡脩起舊廟置百石吏卒在黃初二年正月碑特連文書之後漢書孔僂傳初平帝時王莽秉政乃封孔子後孔均爲褒成侯及王莽敗失國建武十三年世祖復封均子志爲褒成侯世世相傳至獻帝初國絕此碑云大道衰廢禮學滅絕卅餘年皇上紹繼微絕獻帝



卽位初平元年下距黃初二年共卅二年其數正相合

膠東令王君廟門碑

黃初五年

右膠東令王君廟門碑在濟寧州學宮隸續本有此斷碑以他碑下段合讀爲一後乃知其誤其石久亡乾隆四十年李東琪始訪得其上段碑皆述王氏先世有云葬于京師者五世碑末叙其人年卅有一卒當黃初五京師當謂洛陽

廬江太守范式碑并陰

青龍三年

右廬江太守范式碑在濟寧州學宮碑僅存上段式字巨卿山陽金鄉人見後漢書獨行傳傳云式後遷

廬江太守有威名卒於官碑云遷廬江太守寶疏氏之至順以疾告辭式未嘗卒於官是史誤碑云常山相暨子汜孫而亂嗣罔繼青龍二年上計吏翟循等刊銘樹墓傳云式一名汜亦誤也碑陰有題名四列隸釋誤爲魯峻碑陰今又失其大半

東武侯王基碑

景元二年四月

右東武侯王基碑在洛陽縣近年始出土相傳下半段尚有未刻朱字應手而滅碑止得其中段前三行行廿二字後十六字俱下一格行廿一字銘辭我下文尙未完上下石理完好方格界線具在其爲未刻完碑無疑基字伯輿東萊曲城人魏志有傳以此碑

證之所歷官階及薨年追贈皆合後漢書鄭玄傳門人東萊王基此碑年七十二景元二年四月辛丑薨立卒于建安五年基止十一歲未必親受業於鄭君故傳稱門人而不稱弟子亦其證也

盪寇將軍李苞通閣道碑

景元四年十二月

右盪寇將軍李苞通閣道碑在褒城縣石門苞通閣道在景元四年十二月魏志三少帝紀景元四年夏五月詔使鄧艾鍾會伐蜀鍾會傳會統十餘萬衆分從斜谷駱谷入先命牙門將許儀在前治道會在後行而橋穿馬足陷於是斬儀其時閣道之壞可知十一月蜀平後因有此役前有潘宗伯韓仲元泰始六

年造橋閣題字

吳

九真太守谷朗碑

鳳凰元年四月

右九真太守谷朗碑在耒陽縣碑云豫章府君之曾孫公府君之孫公府君當是三公府之屬官他碑未見此稱朗弱冠歷右職守陽安長其守陽安長者非授陽安長也故升王府除郎中尙書令史郡中正遷長沙劉陽令與調任之制異矣遷部廣州督軍校尉吳志黃武五年分交州置廣州俄復舊永安七年復置廣州此爲廣州督軍校尉當在永安以後碑云獨與弟居翁氏釋居作展誤

禪國山碑

天璽元年

右禪國山碑在宜興縣張渚鎮北董山之巔碑形圓而橢土人稱爲圀碑以其形似米圀也碑叙孫皓卽位以來郡國祥瑞千餘言又于乙未年正月辛亥得玉璽文曰吳眞口帝乃以次年丙申改元天璽於是丞相沈等十四人請封禪國山告祭刊石吳志天璽元年吳郡言臨平湖邊得石函中有小石青白色長四寸廣二寸餘刻作皇帝字於是改元大赦臨平湖邊所得小石卽碑所云玉璽也改元者改天冊爲天璽也志又于秋八月後言吳興陽羨山有空石長十餘丈名曰石室在所表爲天瑞乃遣兼司徒董朝兼

太常周處至陽羨縣封禪國山明年改元大赦以協石文改元者改天璽爲天紀也其實臨平湖得玉璽在天冊元年正月封禪國山在天璽元年八月後故碑叙丞相沈等請封禪國山在改元天璽之後志稱臨平湖得玉璽亦在天璽元年此則史之誤也當以碑爲正

天發神讖碑

天璽元年八月

右天發神讖碑在江寧府學尊經閣嘉慶十一年燬于火據山謙之丹陽記此石晉宋時已析爲三段故又稱三段碑亦名紀功碑上天帝言以下皆天發神讖文天璽元年朶月以下皆驗視文字始末蘭臺東

觀令以下皆摹刻立石銜名吳志是年言得石者三  
獨不書此碑始末蓋其時言符瑞者日至史書之不  
勝書也會稽陳治九江費宇皆不見于史

衡陽太守葛祚碑

右衡陽太守葛祚碑在句容縣西五里寶刻叢編引  
諸道石刻錄有此碑文云吳故衡陽郡太守葛府君  
之碑搜神記葛祚字亢先丹陽句容人吳時爲衡陽  
太守郡境有大槎橫水能爲妖怪祚將去官乃大具  
斤斧之屬將伐去之是祚自衡陽太守歸卒於家此  
是表墓之碑而僅存其額吳志太平二年以長沙西  
部爲衡陽郡沛郡繆祿亦嘗爲是郡太守見薛瑩傳

晉

任城太守夫人孫氏碑

泰始八年十二月

右任城太守夫人孫氏碑在新泰縣新甫山下夫人  
濟南人光祿大夫建德亭侯孫邕仲女碑云夫人在  
羊氏任城太守不知羊氏爲何人碑叙魏文帝以桓  
伯序寡妻妻其父夫人謂父辭之是時夫人年當及  
笄下云夫人爲婦卅餘載則夫人卒時當六十餘歲  
魏文帝崩在黃初七年至晉武帝受禪泰始元年已  
四十年夫人之卒亦當在晉初碑末云□□八年□  
月庚寅□十二月甲申□八年上當是泰始二字庚  
寅下當是薨字十二月甲申是其嗣子立碑之日錢



辛楣少詹謂碑有庚寅十二月甲申以干支求之當是泰始六年不知碑作八年字甚分明庚寅上有月字是紀日非紀年錢氏說誤

太公呂望表

太康十年三月

右太公呂望表在汲縣太公廟凡廿行行卅字有直行界線中段已有斷痕碑云太康二年縣之西偏有盜發冢得竹策之書書藏之年當秦坑儒之前八十六歲荀勗穆天子傳序所得紀年蓋魏成王子今王之冢自今王二十一年至秦始皇燔書之歲八十六年其紀年曰康王六年齊太公望卒參考年數蓋壽百一十餘歲史記齊太公世家亦云太公之卒百有

餘年其所述皆與此碑同

征東將軍軍司劉韜墓志

右征東將軍軍司劉韜墓志在偃師縣武虛谷大令家文云君諱韜字泰伯叔考處士君之元子也韜蓋爲人後者爲之子叔考處士君是其所生父也

驃騎將軍韓府君神道闕

右驃騎將軍韓府君神道闕在洛陽縣近年始出于古井中文云口故散騎常侍驃騎將軍南陽堵陽韓府君墓神道兩旁字已半泐第一字不可辨晉書地理志堵陽縣屬南陽國魏赭陽屬建城郡訪碑錄列此碑于晉末今從之

前秦

廣武將軍口產碑并陰

建元四年十月

右廣武將軍口產碑在宜君縣碑已殘泐前叙其先世次叙其政績未有官名疆界似是紀功立界之碑碑首維大秦建元四年歲在丙辰秦苻堅以晉哀帝興寧三年改元建元其四年當晉廢帝太和三年歲當在戊辰而碑云丙辰是撰文人誤記碑未有銘不書銘曰亦變例也碑陰有夫蒙頭夫蒙彭口部夫蒙獲部夫蒙大毛部夫蒙傷大部夫蒙大祁部夫蒙進部夫蒙犁部當是所屬部落名新唐書突厥傳有夫蒙靈咎當卽其遺種元和姓纂夫蒙今同蒲二州多

此姓

梁

石井闌題字

天監十五年

右石井闌題字在句容縣北文云梁天監十五年太歲丙申皇帝愍商口之渴乏乃詔茅山道士口口永若作亭及井十五口此乃其一也以造井亭作功德亦梁武侯佛之一證

始興忠武王蕭憺碑并陰

右始興忠武王蕭憺碑在上元縣黃城村碑高一丈四尺餘約三千餘字碑左邊并上截俱殘泐金石萃編僅辨十之三此拓本視王氏所釋多百餘字憺字

僧達太祖第十一子天監元年封始興郡王普通三年十一月薨贈侍中司徒驃騎將軍諡曰忠武碑所述官階與梁書本傳同銘辭式雕立永寄希仰立下無殘泐痕似書碑者脫一字

安成康王蕭秀碑

右安成康王蕭秀碑在上元縣黃城村碑已全泐僅存其額文云梁故散騎常侍司空安成康王之碑梁書安成康王秀傳字彥達太祖第七子天監元年封安成郡王十七年薨贈侍中司空諡曰康此碑額書散騎常侍而不書侍中與始興忠武王碑額異

吳平忠侯蕭景神道闕

右吳平忠侯蕭景神道闕在上元縣清風鄉文云梁  
故侍中中撫將軍開府儀同三司吳平忠侯蕭公之  
神道此反手書在石闕上梁書蕭景傳字子昭高祖  
從父弟高祖踐阼封吳平縣侯普通四年卒贈侍中  
中撫軍開府儀同三司諡曰忠碑云中撫將軍傳云  
中撫軍錢辛楣少詹以爲傳脫一字

後魏

孝文帝弔比干墓文并陰

太和十八年十一月

右孝文帝弔比干墓文在汲縣比干廟魏書高祖紀  
太和十八年十一月車駕幸鄴甲申經比干之墓傷  
其忠而獲戾親爲弔文樹碑而刊之原碑久亡此是

宋元祐五年知衛州吳處厚取舊揚重刊本碑多異  
文執垂益而談卡今近時德州新出高貞碑云清暉  
發於載卡卡是弄字此復借弄作筭聆廣莫之颺瑟  
兮颺卽颺字匡謬正俗易古文戮字麥卽戮故颺字  
从戠作颺碑陰列諸王從臣八十二人皆著其郡而  
不著其縣亦他碑所僅見

始平公造像記

太和廿二年

右始平公造像記在洛陽縣老君祠碑正書陽文凸  
起漢碑唯執金吾丞武榮碑額有此碑字皆用陽文  
前此所未有也碑云父使持節光口大夫洛州刺史  
始平公魏書地形志洛州太宗置太和十七年改爲

司州此碑立于太和廿二年其爲洛州刺史當在十七年以前又魏置始平郡眞君年中併入扶風郡在太和前二十餘年此所封當是扶風郡之始平縣惜碑不著其姓名

楊大眼爲孝文皇帝造像記

右楊大眼爲孝文皇帝造像記在洛陽縣伊闕碑不書年月結銜稱輔國將軍直閣將軍□□□□梁州大中正魏書楊大眼傳世宗初裴叔業以壽春內附大眼與奚康生等率衆先入以功封安成縣開國子食邑三百戶除直閣將軍尋加輔國將軍游擊將軍出爲征虜將軍東荊州刺史宣武紀正始元年正月



丙辰東荊州刺史楊大眼大破羣蠻樊季安等大眼此記當在景明中梁州大中正本傳亦不載彭王衢於三紛何超晉書音義彭與靜同

魏靈藏造像記

右魏靈藏造像記在洛陽縣伊闕碑亦不載年月訪碑錄云字體似楊大眼記故附於後碑異字造作避亦作𠂔𠂔作𠂔𠂔作𠂔𠂔作𠂔擊作擊諸家皆未舉

孫秋生等二百人造像記

景明三年五月

右孫秋生等二百人造像記在洛陽縣伊闕碑上截爲孫秋生等造像記下截爲維那程道起等題名碑首稱太和七年碑末題景明三年歲在壬午五月戊

子朔廿七日造訖其相距已二十年魏書世宗紀是年閏四月丁巳司空穆亮薨若以五月戊子朔推之閏四月不得有丁巳日知史誤也

比丘法生造像記

景明四年十二月

右比丘法生造像記在洛陽縣文云魏景明四年十二月一日比丘法生爲孝文皇帝并北海王母子造是時孝文帝薨五年矣魏書北海王詳獻文帝子太和九年封母高太妃是時並存洛陽伽藍記追聖寺北海王所立也

石門銘

永平二年正月

右石門銘在褒成縣文云此門蓋漢永平中所穿皇

魏正始元年漢中獻地褒斜始開三年假節龍驤將軍督梁秦諸軍事梁秦二州刺史泰山羊祉表求自迴車已口開創舊路詔遣左校令賈三德共成其事起四年十月十日訖永平二年正月畢功魏書宣武紀正始四年九月甲子開斜谷舊道卽其事魏書羊祉在酷吏傳正始二年王師伐蜀以祉假節龍驤將軍益州刺史出劔閣而還又以本將軍爲秦梁二州刺史太平寰宇記迴車戍在梁泉縣南一百六十六里梁太清五年西魏遣雍州刺史達奚武爲大都督率衆七萬由陳倉路取迴車戍入斜谷關出白馬道謂此也諸葛孔明稱葛氏亦見于此銘

他和寺造像記

永平四年十月

右他和寺造像記在洛陽縣文云永平四年十月七日他和寺尼道僧略造彌勒像一區他卽企字洛陽伽藍記無此寺當在一千三百六十七所之列

寧朔將軍司馬紹墓誌銘

永平四年十月

右寧朔將軍司馬紹墓誌銘在孟縣某氏紹字元興寧朔將軍宜陽子道壽之子魏書本傳道壽長子元興襲父爵碑首結銜稱魏故寧朔將軍固州鎮將鎮東將軍漁陽太守宜陽子唯宜陽子是襲父爵餘並其所授官也此碑年月干支之誤孟縣志已言之魏書孝文紀太和十七年七月有癸丑戊午若七月庚

辰朔不得有戊午日此亦碑誤之一證

安定王變造像記

永平四年十月

右安定王變造像記在洛陽縣龍門文云安定王仰  
爲亡祖親太妃亡考太傅靜王亡妣蔣妃敬造石窟  
一軀安定王變魏書有傳亡祖親太妃景穆皇帝孟  
椒房也椒房位尊故不著其姓其父安定靜王名休  
以太傅領大司馬詔書皆稱大司馬此稱太傅者以  
三公銜尊在大司馬上

中書令鄭義碑

永平四年

右中書令鄭義碑在掖縣寒同山義字幼麟魏書有  
傳以此碑考之義使宋宋主客郎孔道均就邸設會

酒行樂作均問樂其何如答曰哀楚有餘而雅正不足其細已甚矣而能久乎均嘿然移年而蕭氏滅又稱義注諸經論撰話林數弓又作孔顏諒靈巖頌及諸賦詠詔策行於世皆可補史之闕本傳稱義政以賄成性又嗇客民有禮餉者皆不與杯酒鬻肉西門受羊酒東門酤賣之太和十六年卒詔曰義雖宿有文業而治闕廉情稽古之効未光於朝策昧貨之談已形於民聽可贈以本官加諡文靈此碑稱諡曰文鄭述祖天柱山銘稱文貞公皆諱之也

鄭道昭論經書詩刻

永平四年

右鄭道昭論經書詩刻在掖縣雲峯山前題魏中書

侍郎通直散騎常侍國子祭酒秘書監司州大中正  
出爲使持節督光州諸軍事平東將軍光州刺史司  
州熒陽鄭道昭作結銜與魏書本傳歷官同地形志  
光州治掖城皇興四年分青州置以鄭述祖天柱山  
銘證之道昭以永平三年爲光州刺史此刻于永平  
四年歲在辛卯在到官後一年

揚州長史司馬景和妻孟氏墓誌銘

延昌三年正月

右揚州長史司馬景和妻孟氏墓誌銘在孟縣碑首  
題魏代揚州長史南梁郡太守宜陽子司馬景和妻  
不著其姓以司馬景和墓誌銘攷之景和從龍驤府  
上佐遷揚州車騎大將軍府長史帶梁郡太守魏書

地形志南梁郡屬譙州梁郡屬揚州梁郡揚州治故  
景和爲揚州長史帶梁郡太守此碑夫人以延昌二  
年夏六月薨于壽春壽春亦屬揚州碑首結銜作南  
梁郡太守似誤

松滋公元萇溫泉頌

金石萃編附在延昌末

右松滋公元萇溫泉頌在臨潼縣靈泉觀碑前題魏  
使持節散騎常侍都督雒州諸軍事安西將軍雒州  
刺史松滋公河南元萇振興溫泉之頌魏書孝文紀  
太和十九年六月丙辰詔遷洛之民死葬河南不得  
還北於是代人南遷者悉爲河南洛陽人二十年正  
月丁卯詔改姓爲元氏此碑無年月稱河南元萇當



在太和二十年後萇爲高涼王孤之曾孫高祖時襲封松滋侯魏書有傳碑云孤發軔咸池分條紫漢當時之不避諱如此

涇州刺史齊郡王祐造像記

熙平二年七月

右涇州刺史齊郡王祐造像記在洛陽縣祐爲齊郡王簡子魏書有傳諸碑結銜皆題使持節都督某州諸軍事或題使持節督某州諸軍事此碑稱持節督涇州諸軍事皆省文碑異字希作希儀作儀逸作逸極作極廣作廣跡遠於塵關金石萃編塵關誤作鹿開碑末年月釋亦不全

洛州刺史刁遵墓誌銘

熙平二年十月

右洛州刺史刁遵墓誌銘在南皮縣某氏遵刁雍子也魏書有傳碑所述歷官俱與傳同遵有子十三人碑云小子整等其時整兄楷尙早卒整爲驍騎將軍後贈司空諡曰文獻魏書亦有傳碑云姓氏之興錄於帝圖又云彼彼縣胄帝儻之肩驛代貞賢自唐暨晉刁氏受姓當在堯時帝圖疑識緯書名碑充作充圖作畷汚作汚棣作棣整作整職作戢旄作旄罔作罔皆異文

兗州刺史賈思伯碑并陰

神龜二年六月

右兗州刺史賈思伯碑在兗州府學宮思伯字士休魏書有傳此碑雖殘闕以魏書本傳證之官階皆相

合碑爲兗州故吏沈預民徐貞思等所立故自兗州  
刺史以後遷官皆不載本傳思伯孝昌元年卒碑立  
于神龜二年其時思伯尙存碑陰有宋元人題字

濟青相涼朔恒六州刺史高植墓誌

神龜三年

右濟青相涼朔恒六州刺史高植墓誌在德州田氏  
碑殘泐所存字無幾第一行魏故濟青相涼朔恒六  
州刺史次行君諱植字子建勃海蓀人也末行大魏  
神龜字尙可辨植高肇子魏書本傳植自中書侍郎  
爲濟州刺史歷青相朔恒四州刺史卒贈安北將軍  
冀州刺史又云植頻歷五州皆清能著稱此碑有涼  
無冀與史異也銘云彼蒼者天喪此明公又云每見

我君終始許師碑非其子孫所作

趙阿歡諸邑卅五人造像記

神龜三年六月

右趙阿歡諸邑卅五人造像記在洛陽縣龍門碑下  
截有邑師惠感等題名訪碑錄邑師惠感等造彌勒  
像記卽此文云關口趙阿歡司馬解造彌勒像記云  
都綰關口遊激校尉太平寶宇記左氏傳晉趙鞅納  
王使女寬守闕塞杜預注洛陽西南伊闕口也俗名  
龍門又云造彌勒像一匱張相隊造像記僧資造像  
記又作匱皆匱字異文

平州刺史司馬晒墓誌銘

正光元年七月

右平州刺史司馬晒墓誌銘在孟縣某氏晒字景和

寧朔將軍司馬元興之子景和妻孟氏卒于延昌二年六月景和卒于正光元年七月在其後八年景和授清河內史在延昌後卒贈持節左將軍平州刺史與魏書本傳同

魯郡太守張猛龍清頌碑并陰

正光三年正月

右魯郡太守張猛龍清頌碑在曲阜縣孔子廟猛龍魏書無傳以此碑攷之猛龍字神圖南陽白水人晉西平公軌八世孫軌祖瑒魏明帝景初中西中郎將使持節平西將軍涼州刺史自軌以下皆爲涼官其父生樂歸北魏猛龍以延口中出身奉朝請熙平之年除魯郡太守正光三年吏民爲立此碑辭曰何以

島嶼風化移新唐滎陽縣令盧正道清德碑公下島  
嶼島卽鳧字之俗鳧嶼猶鳧藻碑陰有魯汶陽鄒陽  
平并新陽縣令皆魯郡屬縣魏書地形志魯郡領縣  
五無并當是其後省也

袁永等五十人造像記

正光三年八月

右袁永等五十人造像記在高陵縣袁永作荒杲皆  
俗體廣韻引世本宋大夫東鄉爲賈執英賢傳今高  
密有東鄉姓此記有東鄉毛如東鄉正洛東鄉猛東  
鄉暎周

營州刺史高貞碑

正光四年六月

右營州刺史高貞碑在德州學宮貞魏書無傳碑云

貞字羽真勃海脩人也祖左光祿大夫勃海敬公式  
誕文昭皇太后是爲世宗武皇帝之外祖考安東將  
軍青州刺史莊公卽文昭皇太后之第二兄也魏書  
外戚傳高肇父颺高祖納颺女是爲文昭皇后生世  
宗颺卒景明初贈左光祿大夫賜爵渤海公諡曰敬  
肇長兄琨琨弟偃太和十年卒正始中贈安東將軍  
都督青州刺史諡曰莊是貞爲高颺之孫高偃之子  
偃爲文昭皇后第二兄皇后傳以偃爲文昭皇后弟  
者誤也碑云君姊有神表淑問拜爲皇后偃傳景明  
四年世宗納其女爲貴嬪永平二年立爲皇后卽貞  
姊貞弱冠以外戚除秘書郎遷太子洗馬延昌三年

卒贈驩驤將軍營州刺史諡曰懿魏書道武紀天興元年羣臣言國家萬世相承啓基雲代應以爲號帝下詔宜仍先號以爲魏此碑末稱大代正光四年亦變例也

熒陽太守元寧造像記

孝昌二年正月

右熒陽太守元寧造像記在熒陽縣文云熒陽太守元寧仰爲二聖敬造石像一軀願主上萬祚臣僚盡忠後宮皆潤二聖者高太后胡太后也是年肅宗十七歲尙未得嗣故以後宮皆潤爲祝潤卽孕字之借

馮翊王國典祠令李和之造像記

金石萃編永安元年

右馮翊王國典祠令李和之造像記在甘泉縣秦氏



魏書長孫稚封馮翊王後降爲郡公孝莊本紀武泰元年四月癸卯長孫稚進爵爲王尋改封馮翊王官氏志有皇子典祠令王國無典祠令此可補志之闕

懷令李超墓誌銘

武泰二年正月

右懷令李超墓誌銘在偃師縣學宮超字景昇秦州隴西郡狄道縣都鄉華風里人弱冠舉司州秀才拜奉朝請除恒農郡冠軍府錄事叅軍事宰沁水縣除名爲民熙平二年補荊州前將軍騎兵叅軍事復作懷令正光五年八月十八日卒于洛陽縣之永年里宅時年六十一魏書地形志洛州太和十七年改爲司州時超年三十卽於是年舉秀才亦不得稱弱冠

疑舉在其前稱司州者從後追書之碑狄作拔劾作  
刻日作○族作族總作梲條作循質作質蠻作蠻皆  
異文

中岳嵩陽寺碑

天平二年四月

右中岳嵩陽寺碑在登封縣嵩山會善寺碑記生禪  
師與其徒倫豔造塔事立于天平二年生禪師與裴  
衍相善衍魏書有傳孝昌中北討葛榮見害贈使持  
節車騎大將軍司空相州刺史此碑稱司空公其時  
衍已死矣碑多異字金石萃編云惟儼軌之儼蓋馥  
之蓋不可識儼卽係字蓋馥之蓋諦視碑是蓋字王  
氏誤作蓋

南秦州刺史司馬昇墓誌銘

天平二年十一月

右南秦州刺史司馬昇墓誌銘在孟縣某氏昇字進宗河內溫縣孝敬里人魏書無傳孟縣志攷爲司馬楚之之孫與延宗茂宗慶宗爲兄弟行其說頗核昇以孝昌二年釋褐太尉府衛叅軍除懷縣令以天平二年二月廿一日春秋卅有一薨于懷縣贈使持節冠軍將軍都督南秦州諸軍事南秦州刺史以縣令而贈刺史亦異數也

比丘洪寶造像記

天平二年

右比丘洪寶造像記在登封縣少林寺文云務聖寺檀主張法壽能于五蓋重羅之下契斷恩愛塵勞之

繪網於熙平二年捨宅造寺其息榮遷刊石建像授  
堂金石跋作張法舜誤碑靈作需勞作勞習作繪鑿  
作礪規作顥懿作懿舍作洽皆異文

王方略等造須彌塔記

天平三年正月

右王方略等造須彌塔記在偃師縣古聖寺文云大  
魏天平三年歲次丙辰正月癸卯朔魏書孝靜紀天  
平三年亦書春正月癸卯朔碑有教化主王方略邑  
師法顯訪碑錄作法顯等造須彌塔記碑丙作庚卯  
作印區作堀陞作陸屬作屬皆異文

齊州刺史高湛墓誌銘

元象二年十月

右齊州刺史高湛墓誌銘在德州封氏湛字子澄勃

海滌人也祖冀州刺史勃海公考侍中尙書司徒公  
以魏書外戚傳攷之湛是高颺之孫高肇之子湛以  
元象元年正月廿四日春秋卅三肇死在延昌四年  
湛年二十未爲官史書肇子有植無湛湛以熙平間  
起家爲司空叅軍轉揚烈將軍羽林監天平之始假  
驄驤將軍行襄城郡事尋除使持節都督南荊州諸  
軍事鎮軍將軍南荊州刺史復除大都督行廣州事  
卒後贈假節督齊州諸軍事輔國將軍齊州刺史碑  
云天平之始襄城阻命又云於時僞賊陳慶率林攻  
圍孤城獨守載離寒暑孝靜紀天平二年二月戊戌  
蕭衍司州刺史陳慶之寇豫州刺史堯雄擊走之史

作陳慶之碑作陳慶是省文魏書地形志無南荊州蠻傳云延興中大陽蠻酋桓誕擁沔水以北渚葉以南八餘萬落遣使內屬高祖嘉之拜誕征南將軍東荊州刺史治朗陵太和十年移居潁陽永平初東荊州表曰太守桓叔興前後招慰大陽蠻歸附者一萬七百戶請置郡十六縣五十延昌元年拜南荊州刺史居安昌隸於東荊後六鎮秦隴所在反叛二荊蠻大擾動寇盜至於襄城蕭衍遣將圍廣陵樊城諸蠻並爲前驅連年攻討散而復合湛之爲南荊州刺史正在此時

敬使君顯儁碑并陰

興和二年

右敬使君顯儁碑在長葛縣陘山書院碑立于興和二年載顯儁爲潁州刺史營造禪靜寺故碑前上題禪靜寺刹前銘下題敬史君之碑顯儁北齊書有傳其所書仕魏官階不及此碑之詳碑書大承相勃海王卽齊獻武王高歡與天子皇帝今上等字俱空一格除殘拯溺非莫可非下似脫公字宿棖輕肥棖卽表字碑陰有默曹姚秦錢辛楣少詹云隋書百官志有墨曹無默曹借默爲墨也魏書崔巨倫傳除冀州鎮北府墨曹參軍字亦作墨又有沙門統沙門都維那隋書百官志齊循魏制昭玄寺掌諸佛教置大統一人統一人都維那三人此碑陰維那亦沙門爲之

他碑亦有俗姓人稱都維那維那者

兗州刺史李仲璇脩孔子廟碑并陰

興和三年十二月

右兗州刺史李仲璇脩孔子廟碑在曲阜縣孔子廟  
仲璇魏書有傳除兗州刺史脩孔子廟傳中亦言之  
碑結銜稱使持節都督兗州諸軍事車騎大將軍當  
州大都督兗州刺史官氏志無大都督唯云永安已  
後遠近多事置京畿大都督此碑云當州大都督高  
湛碑云南荊州刺史當州大都督敬使君碑云加拜潁州  
云東荊州刺史當州大都督敬使君碑云加拜潁州  
刺史大都督潁州諸軍事永安已後所置大都督當  
不止于京畿矣晉書石崇傳嘗與王敦入太學見顏



回原憲之象洛陽伽藍記國子學堂內有孔丘像顏  
淵問仁子路問政在側此碑云命工人脩造容像雕  
素十子口列其側當時孔廟素像亦無定制碑陰有  
幢主隊主亦見隋書百官志

張保洛等造像記

武定七年二月

右張保洛等造像記不知所在碑前題張保洛劉襲  
薛光熾三人結銜皆稱東雍州此當刻于東雍州魏  
書地形志東雍州世祖置太和中罷天平初復後周  
改爲絳州張保洛北齊書有傳碑結銜皆與傳同傳  
唯不言東雍州鎮城保洛本由齊神武起家碑云敬  
造石碑像四佛四菩薩仰願先王婁太妃大將軍令

公兄弟等亡者昇天現在眷屬輔相魏朝永隆不絕  
先王卽齊神武婁太妃卽神武婁后大將軍卽文襄  
令公卽文宣魏書孝靜紀武定七年八月辛卯齊文  
襄王薨碑立于武定七年二月八日是時文襄猶存

武德于府君義橋石像碑

武定七年四月

右武德于府君義橋石像碑在河內縣武德鎮碑載  
宣威將軍懷州長史行武德郡事河南于子建暨平  
皐令杜護宗懷縣令李同賓州縣令馬洛周溫縣令  
燕景裕丞呂思哲等脩造武德義橋石像七月六日  
經始此橋廿四日便訖碑立於武定七年四月八日  
脩橋當在其前碑云皇朝遷鼎卜食漳濱遂方割四

縣在古州城置武德郡焉魏書地形志武德郡天平  
初分河內置領縣四平阜溫懷州卽碑所載四令遷  
鼎謂天平元年遷鄴金石萃編謂太和十七年遷洛  
者誤也

脩太公廟碑并陰

武定八年四月

右脩太公廟碑在汲縣西北三十里太公廟前列晉  
太康十年盧无忌太公呂望表唯不載其銘太公姓  
呂名望以後爲汲郡太守穆子容山行之文碑載太  
公肩孫尙天寶等以盧无忌置碑僻據山阜崔瑗列石  
不枕康衢遂更營此碑水經清水注汲郡城東門北  
側有太公廟廟前有碑令崔瑗立城北三十里有太

公泉泉上又有太公廟范陽盧无忌爲汲令立碑于其上此碑末題武定八年四月庚辰朔十二日辛卯建造酈氏所不及見也碑陰有故板授鉅鑣太守故板授河北太守等銜文選陸士衡謝平原內史表注凡王封拜謂之板官此板授疑亦出于諸王封拜

僧演造像記

大統四年七月

右僧演造像記在長安縣有殍難將軍郭穆伏波將軍任歡魏書官氏志伏波將軍第五品殍難將軍從第七品碑質作質減作減區作區圖作湍演作演將作得袁作堯皆異文

曹續生造像記

大統五年二月

右曹續生造像記在富平縣文稱威烈將軍富平令  
頻陽縣開國男曹續生又云現治富平令曹魏書地  
形志富平屬北地郡金石萃編以營丘郡天平四年  
所置富平當之誤矣、

法顯造玉石像記

大統十七年

右法顯造玉石像記在吳縣畢秋帆尙書家文云大  
統十七年十二月五日襄威將軍□小開成主始平  
縣佰副□□七世父母所生父母亡息法顯造玉  
石像一區願亡者速度八難佰卽伯字此記字畫不  
整諸家皆誤釋

強弩將軍趙振造像記

右強弩將軍趙振造像記在洛陽縣文云強弩將軍  
掖庭令趙振仰爲七世父母上拷敬造彌勒像一堪  
魏書官氏志有掖庭監無掖庭令唐六典魏晉並有  
掖庭令而非宦者堪卽龕字

洛州鄉城老人造像記

右洛州鄉城老人造像記在洛陽縣賓陽洞文云今  
吉万歲卅四人等□□敬造尊儀一龕碑額題洛州  
鄉城老人佛碑末有年月一行中州金石記謂碑有  
大齊字諦視大下字已全泐金石萃編謂在太和十  
七年洛州未改司州以前亦未敢信今姑附于魏末

平津讀碑記卷二終